

痛史

第一函
十五冊

哭廟記略

順治十七年庚子十二月朔。新任吳令任維初。山西人也。由貢生爲學諭。遷秩吳門。蒞任之日。謁郡侯余公。至府門。左右請步入。憲曰。彼亦官也。我亦官也。何以步爲。左右大懼。置之於門。曰。甯受責不敢擡進。余公聞之。笑曰。新任吳令。是一獸者。謁司理高公。亦然。高公怒。不與相見。至署陞堂。開大竹升數十。浸以溺。示曰。功令森嚴。錢糧最急。考成殿最。皆係於此。

國課不完者。日日候比。不必以三六九爲期也。初二日午間。卽出比。負欠數金者。責二十。欠三錢以上者。亦如之。稍輕反責。隸有以痛而出聲者。則大怒。令隸扼其首。必使無聲。故受杖者。皆鮮血淋漓。不能起立。無

何而一人杖斃矣。合邑之民。無不股栗。十八年正月。中旬。維初入常平倉。每石食米。取七升三合。統計得千石。付縣總吳行之糶焉。蓋是時官收民兌。故糧有缺少。仍各戶補償。自有明至我朝。定鼎三百年來。從未有如維初之典。守自盜者也。於是邑之父老。以及婦人小子。皆懷不平。而諸生倪用賓等有哭廟之舉焉。

二月初一日。章皇上賓。哀詔至姑蘇。府堂設幕。哭臨三日。初四日。倪用賓等哭廟。薛爾張作文。丁子偉於府教授程公翼蒼處。請文廟鑰。諸生百餘人至廟。鳴鐘擊鼓。卽並至府堂。時撫臣朱國治。按臣張鳳起。道臣王紀。及府縣官。暨郡中縉紳孝廉。咸在。因跪進揭帖。維時相從而至者。且千餘人。號呼而來。皆欲逐任知縣者也。撫臣大駭。叱左右擒獲。衆懼。

譁然鳥獸散。其被獲者止十一人。曰倪用賓、沈琅、顧偉業、張韓、來猷琪、丁觀生、朱時若、朱章培、周江、徐玠、葉琪。同任維初。發道尊王公研訊。道尊卽拘吳行之拷問。據招經手糶米止四百石。得銀三百二十兩。交與本官。又訊維初何故糶糧。維初曰。犯官到任止二月。無從得銀。而撫臺索餽甚急。故不得已而糶糧耳。復問十一人。十一人則極言知縣之貪而酷也。撫臣使人睥視。還報。以維初之及於己也。大驚。卽使人於道尊處取口供。使易之。復發一憲牌與維初。高擡年月。其略曰。兵餉甚急。多征糧米。以備不虞。蓋欲使維初立於無過之地也。獄旣成。拘十一人於府治之亭中。拘維初。吳行之於府署之土地廟。

當是時。府教授程公翼蒼參任維初六案。程公名邑。江甯人。壬辰進士。

選翰林庶吉士。丙申外調。銓蘇州府教授。蒞任後。每月一課。郡之士靡然嚮風。自開國以來。樂育英才。無忝厥職者。惟程夫子一人而已。初五日。撫臣集府縣並鄉紳謂之曰。任令一事。意欲從輕發落。不謂諸生鳴鐘擊鼓。震驚先帝之靈。而程教官又參六案。不得不上聞矣。奈何。衆官暨鄉先生俱唯唯。於是撫臣拜疏。其略曰。爲縣令催征招尤。劣生糾黨肆橫。謹據實直陳。亟賜法處事。看得兵餉之難完。皆由蘇屬之抗納。而吳縣爲尤甚。新令任維初。目擊舊官皆以未完降革。遂行嚴比。以副考成。欲破從前之積習。頓起物情之怨謗。是考成未及。而已先試其毒也。劣生倪用賓。沈琅。顧偉業。張韓。來猷。琪。丁觀生。朱時若。朱章。培。周江。徐玠。葉琪等。廁身學宮。行同委巷。當哀詔哭臨之日。正臣子哀痛幾絕之

時乃千百成羣。肆行無忌。震驚先帝之靈。罪大惡極。其不可逭者一也。縣令雖微。乃係命官。敢於聲言扛打。目中尙知有朝廷乎。其不可逭者二也。匿名揭帖。律令甚嚴。身係青衿。甘於自蹈。其不可逭者三也。尤可異者。道府自有公審。乃串兇黨數千人。羣集府學。鳴鐘擊鼓。其意欲何爲哉。不能爲諸生解也。至於贓款。俱屬風影。止有賣漕一款。出自本役吳行之口供。並無見證之人。贓私真僞。端究再審。總之吳縣錢糧。歷年逋欠。沿成舊例。稍加嚴比。便肆毒螫。若不顯示大法。竊恐諸邑效尤。有司喪氣。催征無心。甘受參罰。苟全身家而已。斷不敢再行追比。櫻此惡鋒。以性命爲嘗試也。臣除將知縣任維初摘印拘留外。爲此密疏題參。伏祈皇上大彰乾斷。嚴加法處施行。二月十一日。具題至京師時。適有

金壇叛逆鎮江失機二事。同時俱發。遂奉旨著滿洲侍郎葉尼。理事官英孚。春沙。海勒布等。公同確議罪具奏。

四月初一日。共傳欽差將至姑蘇。縣官紛紛封民房爲公署。至初三日。則傳在江甯會審。蓋撫臣恐民心有變。不欲至蘇郡也。初四日起解。任令乘馬從。披甲數騎。十一人各械繫。每人押公差二人。披甲數十騎擁之。父兄子弟往送者。止從道旁睨立。不能通一語。稍近則鞭策亂搗。十人行稍緩。亦如之。父兄子弟見之。惟黯然飲泣而已。凡三日至江甯。囚滿洲城。任維初則召保。撫臣以程公翼蒼參任令。恨入骨髓。因併逮之。揚言曰。一至江甯。卽用刑矣。

時督臣卽公名廷佐。駐紮江甯。有惠政。民愛戴之。稱爲郎佛。程公之爲

庶常也。屬郎公教習。因欲爲之解。初八日。公審不召任維初。止嚴刑拷十一人。程公亦俯伏公庭。郎公卒問曰。汝爲誰。對曰教官。曰吳縣教官耶。曰非也。蘇州府教授耳。郎公曰。府教授與汝何涉。可疾去。程公遂出。復使人謂之曰。今日雖喚汝出。滿洲大人未發放也。後日審。可再來。初十日。又審。程公進。郎公又卒問曰。汝旣蘇州府教官耶。我教汝去。何不去。對曰在此聽候。郎公笑謂滿洲大人曰。天下亦有此獸子乎。又顧程公曰。此何所在。汝亦在此聽候耶。又笑謂滿洲大人曰。有此獸子。於是四大人皆大笑曰。有此獸子。可疾去。程公遂歸。繼拷十一人。諸生以糶糧爲辭。四大人怒曰。我方問謀反。爾乃以糶糧爲對耶。前五人二夾。杖三十。後六人一夾。杖三十。諸生皆文士。含冤哀號。痛楚欲絕。

十二日。嚴檄喚吏部員外郎顧予咸。生員薛爾張。姚剛。王仲儒。唐堯治。馮邦。楊世俊。朱嘉遇。及其子朱眞。顧予咸者。字小阮。號松交。丁亥進士。史家巷雅園。卽公宅也。由山陰令陞刑部郎。轉禮部。陞銓曹。順治十六年。以病歸里。杜門不與外事。立少年文社。獎勵後學。築小圃以自娛。哭廟後。道尊以其事就訪於松交曰。任令似不可使任牧民之責矣。撫臣聞其言。大恨之。故及於難。朱嘉遇者。號鳴虞。住申衙前。卽楊山朱氏。吳中富室也。次子典。甲午舉人。三子眞。府庠生。當十一人囚於府治時。曾餉以酒食。或聞於撫臣。故及之。薛爾張等六人。則以其與於哭廟之舉者也。松交卽於十二日起行。

十三日。署吳縣捕廳劉公起解薛爾張等八人。而程公翼蒼復以嚴檄

召併四路馳去。皆至江甯。松交就道時。猶以爲無患。至江甯。城門差官解其腰間織帶。縛兩手。松交曰。我朝廷命官。尙未削職。何得遽如此。差官曰。固知公之未削職也。但爲事至此。不得不然耳。松交已心異其太甚矣。會審時。撫臣囑四大人不問松交。止夾薛爾張。問顧予咸知情否。爾張爲松交多夾四五棍。雖哀號籲天。終不招知情二字。四大人無可如何。因問松交。松交則極言己之無罪。請辨數百言。皆合於理。會審罷。與爾張等同繫府鋪中。府鋪者。故光祿寺也。有數獄卒。將大鐵索盤松交之首。重不可舉。

前翼蒼參任令六案有云。號哭者數千人。撫臣深恨之。囑四大人窮究其人。翼蒼歸。將與於哭廟之舉者。盡列名以上。錢君宮聲聞之。立夜見

翼蒼曰。今縱開列無辜數十。總不滿數千人。無益徒害人耳。且已有子偉聖歎二人。足以塞責矣。翼蒼遂止。四月二十七日。丁子偉金聖歎拘至省。郎公出示云。任令一案。葛藤未已。以後不得再有攀招。自此之後。遂無波及者。郎公之示。雖爲翼蒼。卽造福實無窮矣。子偉聖歎至。各兩夾杖三十。聖歎口呼先帝。四大人怒曰。上初卽位。何得更呼先帝。以詛皇躬耶。掌二十下之獄。

四大人遂同撫臣商榷拜疏。題爲遵旨會審事。江蘇巡撫朱題參一疏。奉旨著臣等公同確議。擬罪具奏。欽此。欽遵。竊臣等會審看得秀才倪用賓等。平時不告知縣任維初。當遣詔方到。輒糾聚羣黨。於舉哀公所。要打知縣。跪進匿名揭帖。鳴鐘擊鼓。招呼數千人。搖動人心倡亂。殊干

國法。查律無正條。所犯事關係重大。應將倪用賓沈玥顧偉業張韓來
獻琪丁觀生朱時若朱章培周江徐玠葉琪薛爾張姚剛丁子偉金聖
歎王仲儒唐堯治馮郅不分首從。立決處斬。妻子奴僕。家資財物。當地
入官。員外顧予咸據薛爾張供。將揭帖與伊看過。丟在地下等語。若非
伊主使。何不與各官鄉宦看。獨與彼看。顧予咸係現任之官。主使衆秀
才寫揭帖。至寫揭在遺詔舉哀之處。使倪用賓等訐告倡亂。應將顧予
咸立決處後。妻子奴僕。家資財物。當地入官。楊世俊應杖四十。流三千
里。朱眞應杖三十。黜庠。書辦吳行之。地方官審時。曾供米四百石。賣銀
三百二十兩。送與任維初等語。今研審云。不曾送去。俱是倪用賓等逼
勒。不得已供的。又審倪用賓等亦云。沒有等語。所有揭內婪贓一款。審

係子虛。吳行之於地方官處。謊供。應杖三十。革役。知縣任維初既無過犯。相應免議。疏中口供。皆非實據。係撫臣爲稿。文致其詞。四大人署名以上者也。

五月初一日。任維初復任。謂衙役曰。我今復任。諸事不理。惟催錢糧耳。甲戶不完。三日一比。負固者夾之。至紳衿大戶。撫軍自有奏銷。縱負固亦不得。不完也。雖其貪酷稍遜。而狼子野心。暴戾如故云。疏既上。奉旨三法司核議具奏。繼又奉旨。江甯公審金壇叛案。鎮江失機。吳縣抗糧等案。著議政王貝勒大臣九卿科道會議。詳擬具奏。議政王覆奏依議。又奉旨。這各案事情。其中豈無輕重。著另擬具奏。於是王大臣更會議。議政王使人讀抗糧疏。至丟在地下一語。遽呼曰。既丟在地下。顧予咸

便無罪了。於是貝勒大臣九卿科道齊聲曰。王爺講得是。議政王曰。汝等再議。還該如何處分。皆曰。願予咸宜革職。議政王曰。彼既無罪。併免革職可也。衆復齊聲曰。王爺講得是。而松交之罪始輕矣。

二十日。撫臣還姑蘇。仰府縣籍沒松交及十八人之家。府尊籍松交家。見可欲之物。皆納袖中。見一銀壺。踏匾置之靴中。見一紫檀匣。封付親隨。捧入私衙。凡資財。官吏劫掠一空。夫人及一子。皆就獄。至第三日夜。有盜三十餘人。踰垣入其家。所餘之物。復皆掠去。長洲劉邑尊奉撫臣命籍各家。見牌內開一朱姓者。不暇致詳。以爲朱鳴虞也。遽籍其家。財物劫掠無算。一妻兩妾。並其子真之妻吳氏皆下獄。而其實牌內朱姓。係朱時若。非朱鳴虞也。劉大悔。出其妻妾及媳於獄。而籍時若之家。

二十三日。長洲縣丞至木瀆。籍周江之家。是日籍沒諸眷屬入獄。有乘轎者。有步行者。有扶老攜幼者。每一起。則以一騎二公差押之。行道之人。皆爲浩歎。郡中訛言大起。有言盡洗一鄉者。有言欲屠城者。人心惶惶。比戶皆恐。或曰。衆秀才何苦作此事。或曰。自是都堂欲如此耳。何與衆秀才事。而城中之人。竟有避患於鄉者。松交繫獄中。自以薛爾張旣不承招。可以無患。至六月中旬。始知自己問絞。大驚哭。謂朱鳴虞曰。以我至市就絞。不如自盡。於是遂自誓於身曰。千古奇冤。又書吏部顧三字於身及首。

二十日。奉密旨。倪用賓。沈珣。顧偉業。王仲儒。薛爾張。姚剛。丁子偉。金聖歎。八名。俱著處斬。妻子家產。籍沒入官。張韓來獻琪。丁觀生。朱時若。朱

章培周江徐玠葉琪唐堯治馮邛十名俱著處斬免籍沒。顧予咸免絞免籍沒。并免革職。餘依議。是時密旨與金壇鎮江共十案俱下。二十三日。四大人差數披甲至獄中取松交。松交大驚。自分必死矣。及至。四大人曰。汝奉皇恩免絞免籍沒。并免革職了。去罷。令左右去項上鐵索。時當甚暑。汗積成膏。腐肉滿鐵索。松交既釋。撫臣聞之。拍案大罵曰。老奴有如此好手段耶。不懌者久之。

十八人在獄中。有守卒百姓者。凡十八人。飲食起居。左右維持必盡力。七月初一日。其卒當更代。乃入謂曰。衆相公亦良善矣。但都爺作對。罪已甚重。不可挽矣。所望者。皇恩卽有大赦耳。我今日去。恐不能復相見也。倘有家書。可速付我。當爲寄去。於是衆人皆作書。或殘柬。或舊紙。或

草紙付於獄卒。初五日至姑蘇。止十五封。倪用賓薛爾張姚剛獨無一言。金聖歎家書云。殺頭至痛也。籍沒至慘也。而聖歎以無意得之。不亦異乎。若朝廷有赦令。或可相見。不然死矣。沈珣以舊紙半幅。稟其尊人伯修。其略曰。兒犯之罪。聞已至重。然無可奈何。所望惟皇恩大赦耳。外惟處分妻子數語。慰父母幾語而已。十五人書中。皆有皇恩大赦之言。而不知皆獄卒之慰詞也。

奉旨有至秋用刑之諭。初七八間。又奉旨特赦金壇一人。撫臣大懼。恐縱虎出押。自貽後患。而欲殺十案之人愈亟矣。七月十三日立秋。十二日撫臣於江甯署中。坐立不甯。因郎公出送蘇大人。欲待之歸。則恐事遲有變。不待之歸。則恐獲罪。而一念及身家。則殺人之念大熾。故十三